

A tene cuenta cu Kwihinan ora construi MFA Noord

ORANJESTAD – Den e caso di e Facilidat Multifuncional na Noord cu ta bou di construccin, a compromete cu a hala e edificio cinco meter for di e sitio original, pa asina preserva e kwihinan rond di dje.

Esaki gobierno a laga sa. Segun nan Team di Maneho di MFA tene cuenta cu tur aspecto rond di e proyecto y mescos cu kier preserva e custumbenan tipico di cada bario, tambe ta pone atencion riba e parti ambiental. “For di comienso nos a enfoca hopi riba green; green den e sistema di panelnan solar, pero tambe den landscaping hunto cu Santa Rosa,” asina director di MFA, Anky Vrolijk a duna di conoce.

“Na MFA Noord kier a proteha e kwihinan mas tanto posibel. Pa esaki a move e edificio un poco mas, pa mantene e matanan di kwihi na luga di kita nan for di caminda.” E decision a bin pa rescata un di varios palonan tipico aki cu tin riba e tereno. Ta trata di palonan cu tin masha hopi aña aki y cu ta brinda hopi sombra tambe. Vrolijk a indica cu arkitecto di e edificio, ir. Orlando Hoevertsz a sinta hunto cu tur esunnan concerni y a tuma e decision aki. “E arkitecto tabatin como prioridad pa conserva esaki y a logra tambe.”

Ademas di conserva e fauna cu ta caracteristico di e bario, e palonan di kwihi, manera a menciona, tambe lo



brinda hopi sombra na tur e bishitantenan di e Facilidat Multifuncional

na Noord, segun gobierno, sin laga afo cu ta un contraste tradicio-

nal banda di e diseño moderno di e edificio. □